

МЕСЯЦА МАРТА 2-Й ДЕНЬ.

ПРАЗДНОВАНИЕ ПРЕСВЯТЕЙ БОГОРОДИЦЕ В ЧЕСТЬ ЧУДОТВОРНЫЯ ЕЯ ИКОНЫ, НАРИЦАЕМЫЯ ДЕРЖАВНАЯ НА МАЛОЙ ВЕЧЕРНИ

На Господи, воззвах: стихиры, глас 6:

Необоримую стену стяжавше, * не яко миролюбцы, но яко вернии, * припадаем к Владычице Деве * и воспоем, братие, предстательство Тоя.

Яко раби, Тебе, Пречистая, взываем: * не отвержи ны, молящихся Ти, * но огради нас покровом Твоим.

Потщися, Царице Благодатная, * услыши молитву мою, * и песнь хваления моего да приидет пред Тя.

Кто возглаголет силы Твоя, Пречистая? * Имамы Тя, Владычицу нашу, * и николиже устрашимся непокоривых сынов.

Слава, и ныне, глас 5:

Святейшая Херувим и высшая Серафим * воистинну, Богородице, Ты еси. * Вемы Тя, Заступницу нашу, * Ты же не престаи о нас молящи, * Державо и Прибежище душам нашим.

Прокимен дне.

На стиховне стихиры, глас 8:

Дивное иконы Твоя явление, * Богородице Пренепорочная, славословим днесь * и Твое заступление нам празднуем. * Мати бо сущи Живота, * молиши о нас Христа, Бога нашего, * на Тя единую надежду возложивших, * Путеводительнице неложная нашего спасения.

Стих: Помяну имя Твое * во всяком роде и роде.

Отложим, вернии, печаль: * се бо вторая неопалимая купина, * икона Богоматере, * людьми православными зримая, * на спасение грешных является.

Стих: Слыши, Дщи, и виждь, * и приклони ухо Твое.

Светися, светися, Новый Иерусалиме, * и радуйтесь, убозии, * яко нерушим есть Сион * и Мати Бога нашего посреде людей Своих.

Слава, и ныне, глас 6:

Светлое днесь Заступницы нашея наста торжество: * да възграется тварь, * да ликовствуют человечестии собори, * созывает бо нас Святая Богородица видети икону Свою, * лучами милости вся православныя освещающую. * Темже, радующесея, вопием: * спаси и нас, Пренепорочная, * верных чад земли Твоя.

Тропарь, глас 4:

Града Сионска взыскующе, * под Твой покров, Дево Чистая, днесь притекаем, * и никтоже возможет на ны, * яко несть град силен, аще не Суцгаго Бога, * и несть ина крепость, аще не милость Владычицы Девы.

НА ВЕЛИЦЕЙ ВЕЧЕРНИ

На Господи, воззвах: стихиры на 8, глас 4:

И рыдах, и взывах к Тебе, Владычице, * но не возмогл есть глас мой, * и заглушися вопль мой от потока грех моих, * и како умолю Тя? * Сама убо даждь ми молитву и сохрани раба Твоего. * Изспе сердце мое и струшием: испещрися глава моя, * изнемогосте от мрака очи мои, * и уязвен есмь в глежню: мою, * но Ты, яко Державная, * спаси мя и подаждь ми велию милость. [Дважды.]

Ины стихиры, глас тойже:

Неправда, яко море, скры землю Твою, * и ныне люте потопляеми есмы, * но Ты простри десницу Твою, * и, яко Всехвальная, постави ны на камене веры, * и спаси ны, Владычице, спаси ны, * и утверди посреде нас державу Твою. [Дважды.]

Змиенравно днесь показуется стадо Твое, * яко ветром, обуреваемы есмы * и не можем терпети, * но Ты, яко Благая, утиши воды пререкания * и не отвержи раб Своих, * сохраняя нам и присно милость Твою. * Аще не Ты, Богородительнице, паче всех превознесенная, * аще не Ты, о Стено нерушимая и мирове Радосте, * кто убо умолит за ны Сына Твоего, Христа Бога нашего, * да помилует сокрушенных сердцем и скорбных людей Своих. * Пред Тем же и буди Ходатаица неусыпная и спаси нас. [Дважды.]

Приидите, вси вернии, * и, купно соборы сотворше, * возопиим Державней Владычице * и тако к Ней возглаголем: * вси неключими есмы, * и того ради припадаем к Ти, * и молим Тя со дерзновением и верою, зовуще: * не презри нас, окаянных, * потщися на умоление и спаси вся православныя. [Дважды.]

Слава, и ныне, глас тойже:

Не надейтесь на князи преходящая: * ничесо бо возмогут и, сыны человечестии суть, * изыдут, яко былие, и никтоже их помянет, * но молитесь, братие, молитесь, * и приимет вы под кров Свой Матерь Бога нашего, * и упокоимся, людие, под ризой Тоя.

Вход. Прокимен дне и чтения.

Бытия чтение (глава 28):

Изыде Иаков от студенца клятвеннаго и иде в Харрань. И обрете место, и спа тамо, зайде бо солнце. И взят от камня места того, и положи возглавие себе, и спа на месте оном, и сон виде: и се лествица, утверждена на земли, еяже глава досязаше до Небес, и Ангели Божии восхождаху и низхождаху по ней. Господь же утверждашеса на ней и рече: Аз **Бог** Авраамов, отца твоего, и Бог Исааков, не бойся, земля, идеже ты спиши на ней, тебе дам ю и семени твоему. И будет семя твое, яко песок земный, и распространится на море, и ливу, и север, и на востоки. И возблагословятся о тебе вся колена земная и о семени твоём. И се Аз с тобою, сохраняяй тя на всяком пути, аможе аще пойдеши. И возвращу тя в землю сию, яко не имам тебе оставити, дондеже сотворити Ми вся, елика глаголах тебе. И воста Иаков от сна своего и рече: яко есть Господь на месте сем, аз же не ведех. И убояся, и рече: яко страшно место сие, несть сие, но дом Божий, и сия врата Небесная.

Пророчества Иезекиилева чтение (главы 43 и 44):

Тако глаголет Господь: будет от дне осмаго и прочее, сотворят иереи на олтари всесожжения вашего и яже спасения вашего, и прииму вы,— глаголет Адонай

Господь. И обрати мя на путь врат святых внешних, зрящих на востоки, и сия бяху затворена. И рече Господь ко мне: врата сия затворена будут и не отверзутся, и никтоже пройдет сквозе их, яко Господь Бог Израилев пройдет ими, и будут затворена. Яко игумен сядет в них снести хлеб, по пути Еламских врат внидет и по пути его изыдет. И введе мя по пути врат святых, сущих к северу, прямо храму, и видех, и се исполнь славы храм Господень.

Притчей чтение (глава 9):

Премудрость созда Себе дом и утверди столпов седмь. Закла Своя жертвенная, и раствори в чаши Своей вино, и угодова Свою трапезу. Посла Своя рабы, созывающии с высоким проповеданием на чашу, глаголющи: иже есть безумен, да уклонится ко Мне. И требующим ума рече: приидите, ядите Мой хлеб и пейте вино, еже растворих вам. Оставьте безумие, и живи будете, и възыщите разума, да поживете, и исправите разум в ведении. Наказуяй злыя, примет себе безчестие, обличаяй же нечестиваго, опорочит себе, обличения бо нечестивому – раны ему. Не обличай злых, да не возненавидят тебе, обличай премудра, и возлюбит тя. Дажь премудрому вину, и премудрший будет, сказуй праведному, и приложит приимати. Начало премудрости – страх Господень, и совет святых – разум. Разумети бо закон – помысла есть благаго, сим бо образом многое поживеши время, и приложатся тебе лета живота.

На литии стихиры, глас 1:

Страшен есть гнев Господень, * на вся смертныя належащ, * но того ради показуется днесь и заступление верным: * се бо прииде Благодатная во спасение людем Своим, * и несть возмогий сокрушити стадо Тоя, * зане всему мирови Владычица есть.

Слава, и ныне, глас тойже:

Правды Вышняя чающе, * не о сем рыдайте, яко истязуеми есте, * и воскликните тако: * вемы, яко окаянни есмы, * но не до конца прогневайся на ны, * молитвами же Богородицы спаси и вся православныя.

На стиховне стихиры, глас 6:

Дева была еси Отроковица смиренна, * днесь же показуешися нам яко Царица и Матерь всяческих, * и, тому дивящися, восклицаем Ти: * како страшна есть тайна сия, * и како достойно восхвалим Тя, Препоблагу, * но, яко Небеса к земле приклоняющая * и землю даже до Небес возведшая, * спаси, Богородице, люди Твоя * и Сама сохрани стадо Твое.

Стих: Преславная глаголашася о Тебе, * Граде Божий.

Исполнися, Благодатная, милости * и услыши ны, молящися Ти * и тако Ти глаголющая: * возрадуйся, Христа Бога рождающая, * зане ублажат Тя вси роди * и восхвалят Тя всяческая, * воистинну бо несокрушима есть Держава Твоя.

Стих: Яко избра Господь Сиона изволи и в жилище Себе.

Свят еси, Господи, * и Матерь Твоя, яко овча, бысть смиренна * и того ради красно днесь преукрасися, * паче всех Безплотных есть слава Твоя, * не подвижится убо и сохранит ны, * яко Всесильна.

Слава, и ныне, глас тойже:

Како воспоем Тя, Владычицу Деву, * и како наречем Тя, Матерь Света неизреченна и неприступна, * но воистинну Богородица Ты еси, * и хвально и прославлено имя Твое * и ныне, и во век веков, * и по скончании века.

Тропарь, глас 4:

Града Сионска взыскующе, * под Твой покров, Дево Чистая, днесь притекаем, * и никтоже возможет на ны, * яко несть град силен, аще не Суцгаго Бога, * и несть ина крепость, аще не милость Владычицы Девы.

НА УТРЕНИ

На Бог Господь: Тропарь Богородице, глас 4:

Града Сионска възскующе, * под Твой покров, Дево Чистая, днесь притекаем, * и никтоже възможе на ны, * яко несть град силен, аще не Суцаго Бога, * и несть ина крепость, аще не милость Владычицы Девы. [Трижды.]

По 1-м стихословии седален, глас 2:

Глас плача слышен есть на Сионе, * и рыдание велие въздвизаемо есть во стогнах святых. * О Владычице Дево, услыши я, Твоими бо люди изливаемы суть, * и спаси град опустошенный.

Слава, и ныне, глас тойже:

В поношении устен и во обдержании языком есмы, * вси бо преогорчихом Царя, Сына Твоего, * и Той посети ны прещением Своим, * но умоли, Дево Пречистая, от Тя Рождагося, * и, аще не до конца прогневался есть, * процветет град опустошенный.

По 2-м стихословии седален, глас 7:

Востани, Владычице, востани, * и облечется Сион в крепость свою, * и вода желчная будет нам, яко мед, * напитаемся, людие, теснотами, иже от Зиждителя суть, * и восхвалим, поюще, Державу Твою, * яко нескончаема есть.

Слава, и ныне, глас тойже:

Страшно есть приражение змия, * клеветник бо и убийца есть искони, * и того ради Тя, о Царице и Дево, молим и не престанем молящи, * зане вемы о Тебе, яко о семени Твоем того глава блюдется * и Держава Твоя нескончаема есть.

Величание:

Величаем Тя, * Пресвятая Дево, * Богоизбранная Отроковице, * и чтим Державный образ святыни Твоея, * имже подаеши велию милость * всем, с верою к нему притекающим.

По полиелеи седален, глас 4:

Аще и едину каплю милости Твоея одождиши ми, Всечистая, * не възможе язык мой достойно Тя възвеличити, * но паче меры и неизреченна есть благодать Твоя, * и пою славу Твою, * яко воистинну Мати Божия Ты еси.

Степенна, 1-й антифон 4-го гласа.

Прокимен, глас 4: Помяну имя Твое * во всяком роде и роде.

Стих: Отыгну сердце мое слово благо, глаголю аз дела моя Царевн.

Всякое дыхание:

Евангелие от Луки, зачало 4.

Во дни оны, воставши, Мариам, иде в горняя со тщанием, во град Иудов. И вниде в дом Захариин, и целова Елисавет. И бысть яко услыша Елисавет целование Мариино, възграся младенец во чреве ея, и исполнися Духа Свята Елисавет. И возопи гласом велиим, и рече: благословена Ты в женах, и благословен плод чрева Твоего. И откуда мне сие, да прииде Мати Господа моего ко мне? Се бо, яко бысть глас целования Твоего во ушию моею, възграся младенец радощами во чреве моем. И блаженна Веровавшая, яко будет совершение глаголаным Ей от Господа. И рече Мариам: величит душа Моя Господа, и возрадовася дух Мой о Бозе Спасе Моем. Яко

призре на смирение Рабы Своея, се бо, отныне ублажат Мя вси роди. Яко сотвори Мне величие Сильный, и свято имя Его. Пребысть же Мариамь с нею яко три месяцы, и возвратися в дом Свой.

По 50-м псалме, стихира, глас 6:

Не имамы инья помощи, * не имамы инья надежды, * разве Тебе, Владычице, * Ты нам помози, * на Тебе надеемся * и Тобою хвалимся, * Твои бо есмы рабы, да не постыдимся.

Канон, егоже краестрочие:

Спаси, Богородице, православную землю и сохрани люди Твоя. Глас 4.

Песнь 1

Ирмос: Отверзу уста моя, * и наполнятся Духа, * и слово отрыгну Царице Матери, * и явлюся, светло торжествуя, * и воспою, радуясь, Тоя чудеса.

Самоизмышленная пагуба покрыла есть всю землю Твою, и мрак велий воцарися днесь в вертограде Твоем. Тяжко ми есть, и рыдаю Тебе, Мати Пречистая, и, аще услышиши, ничесоже устрашуся, и воспою имя Твое, славно бо прославися.

Покаянию научи мя, Владычице, да день и ночь излию слезы моя и да смирен от враг моих воскликну Тебе: никтоже чист, разве Тебе, Отроковице Чистая, и сохранит мя Держава Твоя, славно бо прославися.

Аз из глубины зол моих воию Ти, и не премолчит стон мой пред Тобою: виждь, о, виждь, Владычице Дево, и не отвержи мене, услыши убо вопль гласа моего и покрый мя ризою смиренномудрия Твоего, славно бо прославися.

Суд гневен прииде на ны, и разсыпая радость людей Твоих, вси бо плачем и рыдаем и тако глаголем: о мечу Божий, доколе не упокоишися? Престани убо, пощади ны, и воспоем Державу Владычицы нашея, славно бо прославися.

Из нощи дел прелести погубиша ны, пал есть Сион, и заключени есмы; Иерусалиме, Иерусалиме, почто тако омрачился еси? Того же ради и возопиим Владычице сице: токмо Твоя Держава сохранит ны, славно бо прославися.

Катавасия по уставу.

Песнь 3

Ирмос: Твоя песнословцы, Богородице, * живой и независтный Источниче, * лик себе совокупльшия, духовно утверди, * в Божественней Твоей славе * венцев славы сподоби.

Обольсти мя змий, клеветник бо есть, и, душевредное в себе насаждая, смутилось сердце мое. Яко мертв, пребываю и киими словесы о себе възрыдаю? Но Тя молю, Владычице, молю и глаголю: обладай над ним и от греха моего очисти мя.

Горьким плачем моим, яко воду, излию сердце мое, сокрушение мое яко жертва Тебе, и молю Тя, Пречистая: ей, не отврати мене, раба Твоего, сохрани убо и до последняго дне.

Очи мои померкнуте от язвы моя, и утуди мя бремя мое. Идеже есть слава моя? И заключи мене недруг и враг, аз же, яко милость, приемлю узы моя и пою, веселяся: никто убо, яко Бог, вознесет Сый Христа Своего и Матерь Его, Владычицу нашу.

Руководение подаждь ми, Нищепитательнице, и озари мя светом, еже от Тебе во истощании просиявшим. О Богородице и Мати Бога моего, буди же и мне заступлением верным.

Душетленными помыслы люте стужаемь есмь, и тяжко ми есть. Не ли презриши раба Твоего? Молю убо Тя, Пречистая: изведи мя от гноища моего, исцели раны моя и спаси мя, Владычице, спаси мя.

Седален, глас 3:

О Лествице неизреченна и презрядна, * яко же и лествица, юже виде праотец, с Небеси нисходящу, * тако и Ты, Богоневесто, Небо и землю сочетававшая, * Восхождение Ты еси, имже и упасемся от бед.

Слава, и ныне, глас тойже:

Христа Бога и Сына Твоего, между двою разбойнику на Кресте висима, зряще, * горько рыдала еси, Мати, * и жало вниде в сердце Твое. * О Владычице Дево, болезнующи убо Сама, * спаси днесь вся удрученныя, истязуемая люди Твоя.

Песнь 4

Ирмос: Седяй в славе на Престоле Божества, * во облаце легце * прииде Иисус Пребожественный * Нетленную Дланию и спасе зовущия: * слава, Христе, силе Твоей.

Истощание прииде на рабы Твоя, и дом наш оставися празден и пуст. Хожду и зываю, но несть ми спасающа, едина убо смерть отвечаает на глас мой, и, рыдая, молю Тя и глаголю: не отвержи мене и Ты, Дево Чистая, да спасен буду.

Цветоносную простри, Владычице, руку Твою, и оживет вертоград Твой, и нищии обрящут хлебы своя, и убозии ризы своя, и вси восхвалят имя Твое, яко воистинну неизреченна есть милость Твоя.

Егда восхоцещи, никтоже сокрушит ны, яко великое дерзновение обрела еси у Христа Бога, Сына Твоего, и, сие зряще, вопиеш Ти, Владычице, да сохраниши и ны под кровом Твоим.

Православнии христиане, под Твою милость днесь притекаем и, явление честныя иконы Твоя светло празднующе, сице глаголем Тебе: простираеш и нам, Благодатная, необоримую ризу Свою.

Разумейте, непокоривии языцы, и не хвалитесь о мышце своей, зане един есть град несокрушим, и сия Твоя, Приснодево Владычице, Держава и Царство, еже и стоит до скончания века.

Аз, егда и во узех, но Тобою, Отроковице Чистая, выну свободу есмь, и не в страх ми умаление мое есть, но яко злату – горнило и огонь, сие бо разумея, славлю узы моя и величаю Тя, Непорочную Деву.

Песнь 5

Ирмос: Ужасошася всяческая * о Божественней славе Твоей: * Ты бо, Неискусобрачная Дево, * имела еси во утробе над всеми Бога * и родила еси Безлетнаго Сына, * всем воспевающим Тя * мир подавающая.

Водворяет ны змий во юдоль плача и чаяний злых. Не можем убо терпети скорби своя, но Ты, Богородительнице, простираеш нам покров Свой, и спасени будем от зол.

Отроковице Дево, спасла еси нас от работы вражия, и тем красно написася имя Твое: Царица мирови Ты еси, и Держава Твоя даже до последнего дне.

Света неприступна Мати Ты еси, и всеу днесь подвижися тьма супротивная, никто же возможет на ны, яко с нами Владычица наша, и слава Твоя нескончаема есть.

Людие Божии, друзи моя, уверуйте во Христа, Бога нашего, и в предивно Его Рождшую, храняще убо заповеди Бога Вышняго и обрящете душам вашим мир и велию милость.

Ангели, и тии прославиша Тя, Владычицу всяческих и паче Неба Превознесенную, поют бо Христу, Сыну Твоему: искупил еси люди Твоя, и в человецех благоволение.

Величие Твое кто исповестъ, Богородице, яко паче смысла родила еси Бога Слова, и не может язык человек достойно Тя пети, но прими милостивно молитву мою и сохрани раба Твоего.

Песнь 6

Ирмос: Божественное сие и всечестное * совершающе празднество, * Богомудрии, Богоматере, * приидите, руками восплещим, * от Нея рождающаго Бога славим.

Ночь, и мрак, и воды пререкания люте истязуют землю Твою, се убо прещение Божие и гнев Того есть, но молю Тя, Пречистая, молю и глаголю: аще хоцещи – можещи, и вем, яко умолит Отроковица за Державу Своюю.

Уязвихомся от змия, люди Твоя, и, яко из адова чрева, вопием Ти, Благодатная Дево: не нам, но ради от Тебе избранных и ангельское житие возлюбивших, спаси, Богородице, и вся православныя.

Юзники окованныя, что, о Царице, без Тебе возможем и како от грех своих упасемся? Но Ты, яко Благая, утверди в нас святыню Свою и не отвержи молящихся Ти.

Затмися солнце мое и дух мой изыде в непотребие земли, но темже и вознепщевах: о свете Солнца Правды и смирих гордыню мою, Тебе взываю, Дево Чистая, да спасещи раба Твоего.

Единомудренни да пребудем, людие, и да возрадуемся о ранах, иже от Сотворшаго суть, яко, наказуя, наказа ны Господь, не смерти убо предаде и научи разумети волю Своюю.

Мертвии возстанут, и извержет земля кости своя, зане всех совоскресит нас истощание Претерпевый, и Сей есть Царь мирови, и Матерь Его – Владычица наша.

Кондак, глас 8:

Взбранной Воеводе победительныя песни приносим, * яко даровася нам Держава Твоя, и ничесоже устрашимся, * не от мира бо спасение наше, * но Превознесенныя Владычицы милосердием ограждаемся * и тому днесь радуемся, * яко прииде Заступница на стражу земли Своея.

Икос: Зряще икону Твою: во облацех – Бога и Отца и на руцех Твоих – Христа Бога, Сына Твоего и Спаса мирови, покланяемся ко храму Твоему и, лобызая честныя нози Твоя, взываем Ти сице: воистинну даровася нам спасение велие и надежда наша выну пред нами, яко прииде Владычица на стражу земли Своея.

Песнь 7

Ирмос: Не послужиша твари Богомудрии * паче Создавшаго, * но, огненное прещение мужески поправше, * радовахуся, поюще: * препетый отецв Господь и Бог, благословен еси.

Ликовствуйте, верних собори, и пойте Цареви, Иже на Горних сядящу, яко благословен и дивен есть Бог наш, Велий Ревнитель, и страшен Горний Сион и прославлен во веки.

Юдолию плача земля показася Твоя, огонь палящ прииде и объят ю, но не рыдайте, братие, ибо, яко купина неопалима, храм от Сиона и прославлен во веки.

Имамы Тя, Росодательницу, и николиже устрашимся ветров, от пустынь воздвизаемых, Тя бо, Пречистую, молим и тако зовем Ти: оживи вертоград Твой, и будет прославлен во веки.

Слово лестче положиша на мне врази моя, и сокрушает мя рог непокоривых. Друзи мои, и тии оставиша мя; но не остави мене и Ты, Владычице, и спаси мя, яко Мати Бога моего Ты еси, и храм Твой прославлен во веки.

Обручи мя, о Приснодево, святыне Своей, и не убоюся от тем враг моих, люте нападших на мя, и тако возопию Ти: Иерусалиме, Иерусалиме, святыи еси град и прославлен во веки.

Херувими, и Серафими, и вся Небесныя вои поют Тя, Препоблагословенную, и, вопиюще, глаголют: несть храм иной, разве Тебе, и сей препрославлен во веки.

Песнь 8

Ирмос: Отроки благочестивыя в пещи * Рождество Богородичо спасло есть; * тогда убо образуемое, * ныне же действующее, * вселенную всю воздвизает пети Тебе: * Господа пойте, дела, * и превозносите Его во вся веки.

Рыдание мое приими, Владычице моя, и угаси огонь, еже от супостат разжжен есть, да познаю Бога моего и со тщанием воскликну Ему: пойте и превозносите Его во веки.

Алчуц есмь, и взываю Ти, Владычице, и молю Тя, да не нетление будет ми в честь, но милость Твоя, тако о ней возглаголю: благословите, вся дела Господня, Господа, пойте и превозносите во веки.

Непрестающу гордыню отжени от Мене, Благодатная, и угаси огонь язвы моя, и, не яко дым, но яко благоухание Господеви, воспою братием моим: отроцы, благословите, священницы, пойте, людие, превозносите Господа во веки.

Из пещи разжжения моего, яко из адова пламени, вопию Ти: о Владычице Дево, окропи мя рососою слез Твоих, у Креста Сына Твоего излианных, и воскликну, взывая: благословите Матерь Бога Вышняго, Господа пойте и превозносите во веки.

Алюбомрачное око мое просвети светом смиренномудрия Твоего, и познаю волю Сотворившаго мя, и не от мудрования моего, но сердцем моим воскликну о Нем: Его пойте и превозносите во веки.

Юдуже ꙗ грех, тамо и скрежет зубом, но не премолчи, Дево Чистая, и даждь ми глагол разумения, да потерплю бремя мое и воскликну о Бозе, Спасе моем: благословите, вся дела Господня, Господа, пойте и превозносите во веки.

Песнь 9

Ирмос: Всяк земнородный * да възграется, Духом просвещаемъ, * да торжествует же Безплотных умов естество, * почитающее священное торжество Богоматери и да вопиет: * радуйся, Всеблаженная Богородице, * Чистая Приснодево.

Дыхание бурное не сокрушит и единого от забрал стены Твоя. Храм Твой утвержден есть и не подвижится выну, и, тому радующеся, поем Ти: слава Державе Твоей.

Тайная вся обнаженни показываются днесь. Свят есть суд Твой, о Господи, и свято Имя Твое; но виждь, Боже, яко среди братьий моих Матерь Твоя, и преложи гнев Твой.

Всеоружием веры опояши мене, Благодатная, и смиренномудрием укрепи десницу мою, да, яко страж, пребуду, воспевая имя Твое, и, аще поможеши ми, не подвижуся даже до смерти.

Огнезрачный жезл Твой, яко пламень чист, и сим ведещи, Путеводительнице, люди Твоя, да соблюдутся от бед христианы.

Ярость адова и та не возможет на ны, зане свят есть храм Твой и о семени Твоём клятся Давид, непрестающа хвала Твоя и Держава Твоя до скончания века.

Светилен:

Ублажат Тя, Богородительнице, вси роди, * яко смирение Твое паче всех предукрасися, * и увенчася имя Твое, * и прослави Тя Бог, яко Матерь Свою.

На хвалитех, стихирь, глас 5:

Сядящаго на Херувимех носила еси * матерними объятии, * и Той сотвори Державу Твою, * и, сему радующеся, поем Ти: * осанна, Мати Христа. [Дважды.]

Приснодевство Твое, яко столп недвижим, * и глава его превыше небес, * и сотвори Ти величие Сильный, * днесь мирови Владычица Ты еси, и поем Ти: * осанна, Мати Христа. [Дважды.]

Слава, и ныне, глас тойже:

Воистинну Богородица Ты еси, * неизреченна есть слава Твоя, * и того ради величаем Тя, * со Херувимы и Серафимы зовуще: * осанна, Мати Христа.

Славословие великое и отпуст.

НА ЛИТУРГИИ

Блаженны от канона, песни 3-я и 6-я, на восемь.

Обольсти мя змий, клеветник бо есть, и, душевредное в себе насаждая, смутилось сердце мое. Яко мертв, пребываю и киими словесы о себе възрыдаю? Но Тя молю, Владычице, молю и глаголю: обладай над ним и от греха моего очисти мя.

Горьким плачем моим, яко воду, излию сердце мое, сокрушение мое яко жертва Тебе, и молю Тя, Пречистая: ей, не отврати мене, раба Твоего, сохрани убо и до последняго дне.

Очи мои померкнуте от язвы моя, и утруди мя бремя мое. Идеже есть слава моя? И заключи мене недруг и враг, аз же, яко милость, приемлю узы моя и пою, веселяся: никто убо, яко **Бог**, вознесет Сый Христа Своего и Матерь Его, Владычицу нашу.

Руководение подаждь ми, Нищепитательнице, и озари мя светом, еже от Тебе во истощании просиявшим. О Богородице и Мати Бога моего, буди же и мне заступлением верным.

Ночь, и мрак, и воды пререкания люте истязуют землю Твою, се убо прещение Божие и гнев Того есть, но молю Тя, Пречистая, молю и глаголю: аще хоцещи – можещи, и вем, яко умолит Отроковица за Державу Свою.

Уязвихомся от змия, люди Твоя, и, яко из адова чрева, воишем Ти, Благодатная Дево: не нам, но ради от Тебе избранных и ангельское житие возлюбивших, спаси, Богородице, и вся православныя.

Слава: **Юзники** окованныя, что, о Царице, без Тебе возможем и како от грех своих упасемся? Но Ты, яко Благая, утверди в нас святыню Свою и не отвержи молящихся Ти.

И ныне: **Затмися** солнце мое и дух мой изыде в непотребие земли, но темже и вознепщевах о свете Солнца Правды и смирих гордыню мою, Тебе взываю, Дево Чистая, да спасеши раба Твоего.

Тропарь, глас 4:

Града Сионска възскующе, * под Твой покров, Дево Чистая, днесь притекаем, * и никтоже возможет на ны, * яко несть град силен, аще не Суцгаго Бога, * и несть ина крепость, аще не милость Владычицы Девы.

Кондак, глас 8:

Взбранной Воеводе победительныя песни приносим, * яко даровася нам Держава Твоя, и ничесоже устрашимся, * не от мира бо спасение наше, * но Превознесенныя Владычицы милосердием ограждаемся * и тому днесь радуемся, * яко прииде Заступница на стражу земли Своея.

Прокимен, глас 3, песнь Богородицы:

Прокимен: Величит душа Моя Господа, * и возрадовася дух Мой о Бозе Спасе Моем.

Стих: Яко призре на смирение рабы Своея, се бо отныне ублажат Мя вси роди.

Апостол к филипписиюм, зачало 240.

Братие, сие да мудрствуется в вас, еже и во Христе Иисусе, Иже во образе Божии сый, не восхищением непщева быти равен Богу. Но Себе умалил, зрак раба примим, в подобии человечестем быв, и образом обретесе якоже человек. Смирил Себе, послушлив быв даже до смерти, смерти же крестныя. Темже и Бог Его превознесе и дарова Ему имя, еже паче всякаго имене, да о имени Иисусове всяко колено поклонится небесных и земных и преисподних, и всяк язык исповестъ, яко Господь Иисус Христос в славу Бога Отца.

Аллилуиа, глас 8: Слыши, Дщи, и виждь, и приклони ухо Твое.

Стих: Лицу Твоему помолятся богатии людстии.

Евангелие Луки, зачало 54.

Во время оно, вниде Иисус в весь некую, жена же некая именем Марфа прият Его в дом свой. И сестра ей бе нарицаемая Мария, яже и седши при ногу Иисусову, слышаше слово Его. Марфа же молвяше о мнозе службе, ставши же рече: Господи, не брежеш ли, яко сестра моя едину мя остави служити; рцы убо ей, да ми поможет. Отвещав же Иисус, рече ей: Марфо, Марфо, печешия и молвиши о мнозе. Едино же есть на потребу. Мария же благую часть избра, яже не отыметя от нея. Бысть же егда глаголаше сия, воздвигши некая жена глас от народа, рече Ему: блажено чрево носившее Тя, и сосца, яже еси ссал. Он же рече: темже убо блажени слышавшии слово Божие, и хранящии е.

Причастен: Чашу спасения прииму, и имя Господне призову.

МОЛИТВА

О Державная Владычице, Пресвятая Богородице, на объятиих Своих держащая Содержащаго дланию всю вселенную, Царя Небеснаго! Благодарим Тя за неизреченное милосердие Твое, яко благоволила еси явити нам, грешным, сию святую чудотворную икону Твою во дни сии. Благодарим Тя, яко призрела еси с высоты святыя Своя на чад православных, и, яко солнце светлое, увеселяеши ныне изнемогшия от печали очеса наша пресладостным зрением державнаго образа Твоего! О Препоблагословенная Матерь Божия, Державная Помощнице, Крепкая Заступнице, благодаряще Тя, со страхом и трепетом, яко раби непотребнии, мы припадаем, со умилением, с сокрушением сердечным, со слезами молим Тя: вкорени в сердцах всех нас правду, мир и радость о Дусе Святе, водвори в стране нашей тишину, благоденствие, безмятежие, любовь друг ко другу нелицемерную! Державною Твоею всеильною поддержи нас, слабых, малодушных, немощных, унылых, подкрепи, возстави! Яко да под державною Твоею всегда храними, поем, величаем и славим Тя, Державную Заступницу рода христианскаго во веки веков. Аминь.

ИНА МОЛИТВА

О мира Заступнице, Матерь Всепетая, со страхом, верою и любовию припадающе перед честною иконою Твоею Державною, усердно молим Тя: не отврати лица Твоего от прибегающих к Тебе, умоли, Милосердная Матерь Света, Сына Твоего и Бога нашего, Сладчайшаго Господа Иисуса Христа, да сохранит в мире страну нашу, да утвердит державу нашу в благоденствии, да избавит нас от междоусобных брани и укрепит Святую Церковь нашу Православную, да непозыблему соблюдет ю от неверия, раскола и ересей. Не имамы бо иныя помощи,

не имамы инья надежды, разве Тебе, Пречистая Дево: Ты еси Всесильная христиан Заступница пред Богом, праведный гнев Его умягчающая. Избави всех, с верою Тебе молящихся, от падений греховных, от навета злых человек, от глада, скорбей и болезней. Даруй нам дух сокрушения, смирение сердца, чистоту помышлений, исправление греховныя жизни и оставление согрешений наших, да вси, благодарне воспевающе величия Твоя, сподобимся Небеснаго Царствия и тамо со всеми святыми прославим Пречестное и великолепое Имя в Троице славимаго Бога: Отца, Сына и Святаго Духа. Аминь.